

SCRIPT OF MORNING GOJRI NEWS BULLETIN 14MAY 2026 1015HRS

مارنگ گوجری نیوز بولیٹن 14 مئی 2026

یوہ آکاشوانی جموں بے محمد اکرم تیں خبر سُنو۔

J&K LEADS 2025

نویں دلی مانہ مرکزی وزیر تجارت پیوش گوئل غے ذریعے کل جاری کردہ لیڈز 2025 رپوٹ مانہ جموں کشمیر نانہ ایک اعلی کارکردگی گا طور ور تسلیم کیو گیو ہے۔ یاہ کامیابی جموں کشمیر واسطے ایک اہم پیش رفت غی نشانہبی کرے۔ جس نانہ 2023 تک مرکز غے زیر انتظام علاقوں غے بشکار خواہش مند زمرہ مانہ رکھیو گیو تھو تے بعد مانہ 2024 مانہ فاسٹ موو یعنی جلد آگے بدھن آلی گا طور ور تسلیم کیو گیو تھو۔ اعلی کارکردگی گا طور ور تازہ پہچان لاجسٹک ماحولیاتی نظام، بُنیادی ڈھانچہ ترقیات تے پالیسی۔ و۔ ریگولیٹری فورم ورک مانہ مسلسل بہتری حاصل کرن غی نشانہبی کرے۔

LG VIBRANT VILLAGE

لیفٹیننٹ گورنر منوج سنہا نے کل کپواڑہ مانہ وائبرینٹ ولیج ترے پہلگام غو دورو کیو۔ اپنا دورہ غے دوران ایل جی نے بکھ بکھ منصوبوں کو افتتاح کیو تے سنگ بُنیاد رکھی۔ اُنہاں نے گراں آلاں غی ضروریات تے خدشات ور وی گل بات کی ایک عوامی اجتماع نال خطاب مانہ جناب ایل جی نے کہیو کہ وزیر اعظم نریندر مودی غی قیادت مانہ بھارتی حکومت سرحدی دیہات غی مکمل ترقی واسطے پوری طرح پُر عزم ہے۔ لیفٹیننٹ گورنر نے کہیو کہ گراں تمام موسمی سڑکاں جدید سکولوں تے نوجوانوں واسطے بے پناہ موقع گو مستحق ہے۔ تے یاہ ہی وجہ ہے کہ ہم نانہ کپواڑہ گا سرحدی گراں نانہ 2019 تیں بعد ماڈل گراں مانہ تبدیل کرن غو نظریو رکھاں اُن نے مزید کہیو کہ ہم مل غے اپنا عزم نانہ حقیقت مانہ بدلاں گا۔

CM THANKS EAM

وزیر اعلیٰ عمر عبداللہ نے کویت مانہہ ایک المناک سڑک حادثہ مانہہ جان گوان آلا6 جموں کشمیر گا باشنداں غی لاشاں نانہہ وطن واپس لیان مانہہ سہولیت فراہم کرن ور وزیر خارجہ ڈاکٹر ایس۔جے۔ شنکر غو شکرہو ادا کیو ہے۔ وزیر اعلیٰ نے اس مشکل گا ویلہ مانہہ سوگوار خانداناں نانہہ بروقت مدد فراہم کرن مانہہ کویت تے بھارتی سفارت خانہ غی کوششاں غی وی تعریف کی۔ قابل ذکر ہے جے 6 افراد جن مانہہ 5 غو تعلق راجوری تیں تھو تے ایک پونچھ تیں تھو۔ گزشتہ 8 اپریل نانہہ کویت مانہہ اپنا کم غی جگہ تیں گھر واپس آتاں سڑک حادثہ مانہہ جان گوا گیا تھا۔

GOC WKC KISHTWAR

وائٹ نائٹ کور گا جنرل آفیسر کمانڈنگ لیفٹیننٹ جنرل پی۔کے۔ مشرا نے ، جی۔او۔سی کاونٹر انسرجینسی فورس ڈیپٹاں میجر جنرل اجے سنگھ دابس غے ہمراہ ، کشتواڑ گا علاقہ غو دورو کیو۔اس دوران انہاں نے حفاظتی صورتحال غو جائزو لیو تے انسداد دہشت گردی غی کاروائیاں مانہہ مصروف فورسز غی تیاریاں گو معائنو کیو۔ افسراں نانہہ خفیہ ملی معلومات ، علاقہ مانہہ نگرانی غا اقدامات تے دیگر سیکورٹی ایجنسیاں غے نال مشترکہ کاروائیاں گا بارا مانہہ تفصیل دتی گئی تانجے خطہ مانہہ امن۔و۔استحام، برقرار رکھیو جاسکے۔ فوجیاں سنگ گل بات غے دوران کور کمانڈر نے ان غی لگن، ہر وقت تیار رہن غا جذبہ تے مسلسل چوکسی غی تعریف کی۔

SATISH AAROHAN

کھیڈاں گا وزیر ستیش شرما نے ملک غا نوجواناں تیں اپیل کی ہے کہ وہ منشیات تیں پاک، ترقی یافتہ تے باختیار بھارت غا سفیر بنیں۔ وہ سرینگر مانہہ آروہن 2026 غی اختتامی تقریب تیں خطاب کرریا تھا۔ ملک غی بکھ بکھ ریاستاں تے مرکزی زیر انتظام علاقاں تیں آیا واہ مندوبین تیں خطاب کرتا واں

وزیر نے، نوجوان خدمات تے کھیڈ بارے محکمہ جموں کشمیر غی تعریف کی، جس نے اس قومی سطح غا پروگرام غو انعقاد کیو۔ اس پروگرام غے ذریعے بکھ بکھ علاقوں گا نوجواناں نانہہ جموں کشمیر آن غو موقعو لبے غو۔ اُنہاں نے کہیو کہ آروبن 2026 نوجواناں غی توانائی، نوی سوچ تے قائدانہ صلاحیتاں نانہہ اُجاگر کرن غو ایک بہترین پلیٹ فارم بن غے باندھے آيو ہے۔

RANA DEVP WORKS POONCH

جل شکتی محکمہ غا وزیر جاوید احمد رانا نے گزشتہ روز سرینگر غا سیول سیکرٹریٹ مانہہ پونچھ ضلع غا پی۔ ایچ۔ ای، آبپاشی تے سیلاب بارے روک تھام، تے پی۔ ڈبلیو۔ ڈی محکماں گا سنئیر افسراں غے نال ایک اجلاس غی صدارت کی۔ اجلاس مانہہ ضلع تیں متعلق ترقیاتی کماں تے مسائل غو جائیزو لیو گیو۔ میٹنگ غے دوران بکھ بکھ شعباں غی ترجیحات جاری منصوباں تے نوا مجوزہ کماں ور تفصیلی گل بات ہوئی۔ وزیر نے حقیقت پسندانہ منصوبہ بندی، وقت ور کم مکمل کرن تے وسائل غا بہتر استعمال ور زور دتو۔ اُنہاں نے افسراں نانہہ ہدایت دتی کہ سالانہ ایکشن لان عوام غی اصل ضروریاں نانہہ مد نظر رکھتا واں تیار کیو جے، تانجے بُنیادی سہولیات نانہہ بہتر بنايو جاسکے۔

DAR GULMARG CONVENTION CENTRE

وزیر زراعت جاوید ڈار نے گلمرگ کنونشن مرکز غو دورو کیو تے اُت موجود سہولیات غو تفصیلی جائیزو لیو۔ دورہ غے دوران وزیر نے موجودہ بُنیادی ڈھانچہ تے انتظامات غو معائینو کیو تے متعلقہ افسراں نانہہ ہدایت دتی کہ حکومت غی جانب تیں فراہم کی جان آلی سیاح دوست سہولیات تے خدمات غی معلومات موثر انداز مانہہ زیادہ تیں زیادہ لوکاں توڑی پُجائی جے۔ اُنہاں نے بکھ بکھ محکماں غے بشکار بہتر تال میل غی ضرورت ور زور دتو تانجے گلمرگ آن آلا سیاحاں نانہہ دستیاب سہولیات تے خدمات غا بارا مانہہ مکمل معلومات حاصل ہوسکیں۔ جناب ڈار نے کہیو کہ گلمرگ ملک

غا اہم ترین سیاحتی مقامات مانہہ شامل ہے۔ تے جموں کشمیر غا سیاحتی
شعبہ واسطے بے حد اہمیت رکھے۔
